



4 .december 2007

Inatsisartut Forretningsorden-iani § 36 imm.1 tunngavigalugu Naalakkersuisunut apeqquteqaatit makkua apeqquteqaatiginiarpakka:

Naalakkersuisunut apeqquteqaatit: Aningaasatigut inatsisissamut siunnersuummut allannguutissatut siunnersuut.

(Inatsisartunut ilaasortaq, Lene Knüppel, Demokraatit)

Tunngavigisaq:

Ullumi Naalakkersuisut Inatsisartut Aningaasatigut Inatsisissamut siunnersuutertik pappiarannorlugu kiisalu qarasaasiatigut quppersakkakut www.nanoq.gl-ikkut tamanut ammasumik saqqummiuppaat. Kiisalu tamanut ammasumik saqqummiussinermut atatillugu tusagassiortunik katersortitsisarneq ileqquvoq.

Ajoraluartumilli Naalakkersuisut Aningaasatigut Inatsisissamut siunnersuummut Inatsisartuni aappassaaneerneqarneranut aammalu pingajusaaneerneqarneranut atatillugu allannguutissatut siunnersuutiminnik saqqummiussigaangamik naammatumik ammasuunermik aammalu paasinartuuliornermik naamattumik tunniussineq ajorput. Maannakkullu allannguutissatut siunnersuutit Aningaasaqarnermi Ataatsimiititap ilaasortaanut taamaallaat tunniunneqartarput. Naalakkersuisut allannguutissatut siunnersuutaat taamaallaat Aningaasaqarnermi Ataatsimiititap isumaliutissisutaasugit uppersarnerqartarput.

Kisianni Aningaasaqarnermut Ataatsimiititap isumaliutissiissutai assigiinnigitsunik paasinartu-nilli tunngaveqartunik Inatsisartut Aningaasatigut Inatsisissap aappassaaneerneqarnissaa pingajussaaneerneqarnissaalu ullunik pingasunik sioqqullugu saqqummiunneqartarput, taamaammallu taamatut kingusinaartiginerata kingunerisaanik kikkut tamarmik aammalumi Inatsisartunut Ilaasortat allannguutissatut siunnersuutit Inatsisartut aalajangiinissaat sioqqullugu sukumiisumik eqqartornissaannut periarfissaqarneq ajorput. Innutaasut tusaatillu allannguutissatut siunnersuutit saqqummiunneqarnerini oqaaseqarfigisinaanissaat periarfissaqartinneqartariaqaralarpoq, kisiannili taama kingusitsigisumik saqqummiunneqarnerisa kingunerisaannik allannguutissat oqallisinissaannut kiisalu aalajangiisartut aalajangiinissaannut sunniuteqarsinaanissaat takorluuinerinnaasinaavoq.

Tamakkua tunuliaqutaralugit matumuuna Naalakkersuisut qinnuvigerusuppakka apeqquteqaatit makkua akissuteqarfigeqqullugit:

1. Naalakkersuisut Aningaasanut Inatsisissamut allannguutissatut siunnersuutitik aalajangiiffigineqalersinnagit sapinngisamik susasaqartunut amerlanerpaanut siammarnissaat qanoq anguneqarsinnaanersoq Naalakkersuisut takorloorpaat?
2. Naalakkersuisut Aningaasanut Inatsisissamut allannguutissatut siunnersuutitik Aningaasaqarnermut Ataatsimiititamut nassiunneri ilutigalugit Namminersornerullutik Oqartus-



sat qarasaasiatigut quppersagaanut www.nanoq.gl -imut ingerlatinnissaannut teknikikut periarfissaqarnerluni, taamaaliortoqassappallu tamanna aningaasartuteqarnissamik kinguneqassanerluni?

3. Naalackersuisut Aningaasanut Inatsisissamut alannguutissatut siunnersuutigisaasa Aningaasaqarnermut Ataatsimiititamut nassiunneqarnerannut ilutigitillugu siunnersuutit naqitanngorlugit Inatsisartunut Ilaasortanut taamatullu tusagassiortunut nassiunneqarnissaat periarfissaqarnerluni?
4. Kikkulluunniit Aningaasatigut Inatsisissanik suliaqarnernut atatillugu ilisimannilernissaat siunertaralugu pitsaanerusumik siammarterinissamut periarfissat allat suut Naalackersuisunit takorloorneqarpat?

Apeqquteqaatit ullut suliffiusut qulit qaangiutsinnagit akissuteqarfigineqarnissaat kisaatigaara.